



# DASAR PERANCANGAN FIZIKAL DESA NEGARA 2030

*Disediakan oleh:*

## **PLANMalaysia**

PLANMalaysia (Jabatan Perancangan Bandar Dan Desa)  
Kementerian Kesejahteraan Bandar, Perumahan dan Kerajaan Tempatan


*Dasar Perancangan Fizikal Desa Negara 2030 telah **diluluskan** di  
Majlis Perancangan Fizikal Negara (MPFN) pada 26 April 2017 dan  
Mesyuarat Jemaah Menteri (MJM) pada 27 September 2017.*





**PERDANA MENTERI  
MALAYSIA**

## **PERUTUSAN**



Menjelang tahun 2020, dengan matlamat menjadi sebuah negara maju yang berdaya saing di dalam semua aspek, penumpuan terhadap usaha mengagihkan kekayaan negara secara adil dan saksama kepada rakyat dalam konteks perkongsian sepenuhnya adalah amat kritikal. Selaras dengan ini, fokus pembangunan fizikal yang menerapkan elemen keseimbangan dan kesaksamaan antara bandar dan desa melalui perancangan spatial yang teliti adalah menjadi keutamaan kepada kerajaan bagi memastikan kemudahan dapat dinikmati semua rakyat.

Dasar Perancangan Fizikal Desa Negara 2030 (DPF Desa Negara) telah dihasilkan oleh Kementerian Kesejahteraan Bandar, Perumahan dan Kerajaan Tempatan (KPKT) melalui PLANMalaysia (Jabatan Perancangan Bandar dan Desa). Ianya merupakan satu dasar melibatkan perancangan dan pembangunan spatial desa di seluruh negara yang mengambil kira dasar-dasar pembangunan desa sedia ada. Penyediaannya bagi membantu mengatasi isu pembangunan sedia ada dengan mengurangkan jurang pembangunan antara bandar dan desa terutama dari aspek penyediaan kemudahan, infrastruktur, utiliti dan peluang ekonomi, meningkatkan imej dan karektor desa serta menyelaraskan pengagihan sumber dan projek pembangunan kepada kampung yang disasarkan.

DPF Desa Negara 2030 juga merupakan satu *blueprint* penting dalam membantu Pihak Kerajaan merealisasikan hasrat dan komitmen selaras dengan program transformasi negara melalui teras, strategi dan langkah yang ditetapkan bagi membantu pelaksanaan mensejahterakan masyarakat kampung.

Oleh yang demikian, DPF Desa Negara 2030 dapat dijadikan panduan kepada perancangan dan pembangunan spatial yang mantap sekaligus mewujudkan persekitaran dan kesejahteraan hidup yang berkualiti di desa dengan peluang pekerjaan dan perkhidmatan setaraf dengan kawasan bandar. Perlaksanaan DPF Desa Negara diharap dapat membentuk desa yang lebih berkualiti dan lestari selari dengan visinya 'Desa Sejahtera, Negara Sejahtera' serta seterusnya memenuhi aspirasi Transformasi Nasional 2050 (TN50) negara.

**1Malaysia, "Rakyat Didahulukan, Pencapaian Diutamakan"**

**DATO' SRI MOHD NAJIB BIN TUN HJ. ABDUL RAZAK**





## PERUTUSAN

### MENTERI KESEJAHTERAAN BANDAR, PERUMAHAN DAN KERAJAAN TEMPATAN



Malaysia sedang berusaha mencapai matlamat Pelan Transformasi Nasional untuk menjadi negara maju yang berpendapatan tinggi. Menerusi Rancangan Malaysia Kesebelas (RMKe-11), Kementerian dan Agensi yang berkaitan perlu memastikan setiap projek pembangunan luar bandar dibangunkan di lokasi yang bersesuaian dan mampu memenuhi keperluan rakyat dengan impak yang maksimum. Maka selaras dengan itu, Dasar Perancangan Fizikal Desa Negara atau DPF Desa Negara 2030 telah diwujudkan.

lanya merupakan dasar berkaitan pembangunan desa berbentuk spatial pertama di Malaysia yang menyediakan pernyataan dasar, strategi dan langkah pencapaian mengikut tema dan teras bagi merealisasikan visi pembangunan desa sehingga tahun 2030.

Bagi pihak Kementerian Kesejahteraan Bandar, Perumahan dan Kerajaan Tempatan (KPKT), DPF Desa Negara 2030 amat penting kerana ia akan memandu perancangan pembangunan desa di seluruh negara secara holistik sekaligus menjadi pelengkap kepada Dasar Perbandaran Negara (DPN) dan Rancangan Fizikal Negara (RFN).

Penyediaan kerangka DPF Desa Negara 2030 ini sebenarnya telah mengambilkira fokus dan tahap pencapaian dasar-dasar pembangunan desa sedia ada. Berdasarkan maklumat tersebut, pembaharuan dan penambahbaikan dibuat dengan merangka strategi yang telah disesuaikan dengan struktur ekonomi dan sosial desa seluruh negara dengan visi 'Desa Sejahtera, Negara Sejahtera'.

KPKT sangat komited dan akan memastikan pelaksanaan dasar ini disokong dengan program rundingan serta perbincangan bersama semua Kementerian berkaitan dan Kerajaan Negeri bagi menjamin matlamat penyediaan DPF Desa Negara 2030 tercapai. PLANMalaysia (Jabatan Perancangan Bandar dan Desa) selaku tunjang utama di dalam penyediaan dan pelaksanaan DPF Desa Negara 2030, akan sentiasa berusaha memastikan dasar ini dapat membantu pihak Kerajaan mewujudkan kawasan persekitaran desa yang sejahtera untuk didiami secara holistik selaras dengan pelan Transformasi Nasional 2050 (TN50) negara.

**TAN SRI NOH BIN HAJI OMAR**

Menteri Kesejahteraan Bandar, Perumahan dan Kerajaan Tempatan





**PERUTUSAN**  
**KETUA SETIAUSAHA KEMENTERIAN KESEJAHTERAAN BANDAR, PERUMAHAN DAN**  
**KERAJAAN TEMPATAN**



Kementerian Kesejahteraan Bandar, Perumahan dan Kerajaan Tempatan (KPKT) melalui PLANMalaysia (Jabatan Perancangan Bandar dan Desa) telah berjaya menghasilkan dokumen yang akan menentukan hala tuju perancangan dan pembangunan desa di seluruh negara. Dokumen Dasar Perancangan Fizikal Desa Negara 2030 (DPF Desa Negara) ini telah dirangka selaras dengan usaha Pelan Transformasi Nasional 2050 ke arah antara Negara teratas di tangga dunia dalam ekonomi, kesejahteraan rakyat dan inovasi.

DPF Desa Negara 2030 dibentuk berdasarkan lima teras yang mengandungi dasar dan strategi untuk memperkasakan kawasan desa khususnya bagi merapatkan jurang perbezaan dari aspek kualiti hidup masyarakat dan persekitaran antara kawasan bandar dan desa. Menerusi dasar ini juga, perancangan strategi yang teliti dirangka bagi memastikan sumber jaya desa yang berpotensi dieksploitasi secara berhemah sebagai sumber ekonomi baru yang mampu memberikan pendapatan tinggi seterusnya mengubah kualiti hidup masyarakat dan persekitaran desa setaraf dengan kehidupan di bandar.

KPKT yakin bahawa DPF Desa Negara 2030 akan menjadi satu dasar yang sangat penting dalam menentukan hala tuju pembangunan fizikal desa pada masa akan datang. Pelaksanaan dasar ini disokong penuh oleh semua Kementerian, Jabatan dan Agensi berkaitan bagi memastikan perancangan dan pembangunan yang dibentuk akan memberikan impak positif kepada semua kawasan desa di seluruh negara seterusnya mencapai matlamat "Desa Berdaya Huni (*Liveable*) dan Berdaya Tahan (*Resilient*)".

Saya berharap, pelaksanaan DPF Desa Negara 2030 dapat membantu menambahbaik suasana antara kawasan bandar – luar bandar, bukan sahaja dari segi penyediaan infrastruktur dan kemudahan asas malahan mampu melahirkan masyarakat luar bandar yang kompetitif. Sejar dengan itu, KPKT melalui PLANMalaysia akan sentiasa komited dalam memastikan aspirasi masyarakat desa menerusi Transformasi Nasional (TN50) direalisasikan dan kemajuan negara dapat dirasai oleh semua masyarakat dengan saksama.

**DATUK HAJI MOHAMMAD BIN MENTEK**

Ketua Setiausaha

Kementerian Kesejahteraan Bandar, Perumahan Dan Kerajaan Tempatan





# PLANMalaysia

## PRAKATA

### KETUA PENGARAH PLANMalaysia (JABATAN PERANCANGAN BANDAR DAN DESA)



PLANMalaysia (Jabatan Perancangan Bandar Dan Desa) telah berjaya menghasilkan satu dokumen perancangan khusus untuk memacu pembangunan kawasan desa seluruh negara. Dasar Perancangan Fizikal Desa Negara 2030 (DPF Desa Negara 2030) dirangka bagi menangani isu ketidakseimbangan pembangunan antara bandar dan desa dan urbanisasi yang semakin meningkat. Menjelang tahun 2020, jumlah penduduk desa dijangka berkurangan daripada 25.7 peratus pada tahun 2015 kepada 22.8 peratus. Isu pengurangan penduduk ini berlaku berikutan kecenderungan penduduk desa berhijrah ke bandar bagi menikmati kehidupan yang lebih berkualiti.

DPF Desa Negara 2030 merupakan dokumen yang merangkumi pernyataan dasar, strategi dan langkah pencapaian mengikut tema dan teras bagi merealisasikan visi pembangunan desa sehingga tahun 2030. Ianya dibentuk secara '**operational plan**' dengan rangka penyediaan yang selaras dengan matlamat Rancangan Malaysia Kesebelas (RMKe-11).

Berdasarkan pendekatan metodologi baru, penentuan sempadan sesebuah kampung telah dirancang berdasarkan Sistem Grid Desa Malaysia yang sekaligus bertindak sebagai platform dalam menentukan kedudukan spatial kampung dan mengurus maklumat fizikal desa dengan teratur. Sistem Ciri-ciri Desa Malaysia atau *CHARMs* (*Characteristics of Rural Malaysia System*) ini mengandungi beberapa kriteria kemampuan desa yang diyakini dapat membantu di dalam proses memberikan pertimbangan pembangunan terutama melibatkan penyediaan kemudahan awam serta pemantauan pelaksanaan kepada DPF Desa Negara 2030.

Menerusi penyediaan DPF Desa Negara 2030 ini, usaha mewujudkan kawasan desa yang mampan, sejahtera dan sesuai untuk didiami telah dinyatakan dengan jelas melalui visi 'DESA SEJAHTERA, NEGARA SEJAHTERA'. Ianya merupakan terjemahan dari hasrat masyarakat desa yang mahukan kehidupan lebih berkualiti dan persekitaran tempat tinggal yang selesa yang mana sejajar dengan aspirasi Transformasi Nasional 2050 (TN50) oleh Kerajaan. Penghasilan dokumen DPF Desa Negara ini dan dua (2) dokumen yang terdahulu iaitu Dasar Perbandaran Negara dan Rancangan Fizikal Negara juga telah melengkapkan dokumen perancangan spatial bagi seluruh kawasan bandar dan desa di Malaysia. Sehubungan dengan itu, saya berharap pelaksanaan DPF Desa Negara 2030 ini kelak akan berjaya mencapai matlamat dan sekaligus menjadi contoh perancangan fizikal desa yang terbaik.



**DATU' TPr ZAINUDDIN BIN AHAMAD**  
Ketua Pengarah  
PLANMalaysia (Jabatan Perancangan Bandar dan Desa)

